

四庫全書

集部

欽定四庫全書

集部

唐文粹卷

五十九  
六十

詳校官庶吉士臣謝恭銘

助教<sub>臣</sub>常循覆勘

總校官檢討<sub>臣</sub>何思鈞

校對官主事<sub>臣</sub>陳文樞

謄錄監生<sub>臣</sub>葉中桂

欽定四庫全書

唐文粹卷五十九

宋 姚鉉 編

碑十一 總四首

紀功

三受降城碑 呂溫

平淮碑 韓雲卿

平淮西碑 段文昌

幽州紀聖功碑 李德裕

三受降城碑 并序

呂溫

夏后氏遏洪水驅龍蛇能禦大菑以活黔首周文王城  
朔方逐獫狁能捍大患以安中區若非高岸峻防重門  
擊柝雖有盛德曷觀成功然則持璿璣而弛張萬象昊  
穹之妙用扼勝勢以擒縱八極王者之宏圖道雖無外  
權則有備變化消息存乎其人三受降城皇唐之勝勢  
者也昔秦不量力北築長城右扼臨洮左馳碣石生人

盡去不足乘障兩漢之後頽為荒丘退居河澣歷代莫  
進矯亡秦之弊則可矣盡中國之利則未然唐興因循  
未暇經故有拂雲祠者在河之北地形雄坦控扼樞會  
虜伏其下以窺域中禱神觀兵然後入寇甲不及擐突  
如其來鯨一躍而吞舟虎數步而擇肉塞草落而邊氓  
懼河水堅而羽檄走爰自受命至于中興國無寧歲景  
龍二年默啜強暴瀆鄰構怨掃境西伐漢南空虛朔方  
大揔管韓國公張仁愿躡機而謀請築三城奪據其地

跨大河以北嚮制胡馬之南牧中宗詔許橫議不撓

時唐

休璟建  
議非之

於是留及瓜之戍斬姦命之卒六旬雷動三城

岳立以拂雲祠為中城東西相去各四百里過朝那而  
北關斥候迭望幾二千所損費億計減兵萬人分形以  
據同力而守東極于海西窮于天納陰山於寸眸拳大  
漠於一掌驚塵飛而烽火耀孤雁起而刁斗鳴涉河而  
南門用晏閉韓公猶以為未也方將建大旆提金鼓馳  
神策鞠虎旅看旄頭明滅與太白進退小則貢琛費受

厥角定保塞一隅之安大則倒狼居竭瀚海空苦塞萬里之野大略方運元勲不集天其未使我唐無北顧之憂乎厥後賢愚迭任工拙異勢剛者躪武柔者敗律城隳險固寇得凌軼或驅馬飲河而去或控弦劇壘而旋吾知韓公不瞑目於地下矣今天子誕敷文德茂育羣生戢兵和親北狄右衽然而軍志有受降如敵大易有安不忘危崇墉言言其可弛柝亦宜鎮以元老授之廟勝廟述舊職而恢遺功外勤撫綏內謹經略使其來不

敢仰視去不敢反顧永驚猛氣無生禍心聳威馴恩禽  
息荒外安固萬代術何加焉敢勒銘城隅庶復隍而光  
烈不昧銘曰

韓侯受命志在朔易北方之強制以全策亘漢橫塞揭  
茲雄壁如三鬪龍躍出大澤並分襟帶各閉風雷俯視  
陰山仰看昭回一夫登陴萬里洞開日晏秋盡纖塵不  
來時惟韓侯方運神妙觀釁則動乃誅乃弔廓平窮荒  
盡日所照天乎未贊不策清廟我聖耀德罷扃北門優



而柔之用息元元曷若完守推亡固存于襄于夷永裕  
後昆

平淮碑

并序

韓雲卿

惟唐上元辛丑歲叛臣劉展竊地弄兵悖撓天常肆虐  
黎人淮泗而南施于閩越人殘令絕職貢不修先皇帝  
命我特進試鴻臚卿兼御史中丞田神功統盧龍勁卒  
控弦引鐳萬有餘騎涉淮浮江梟懸魁逆布宣德澤返  
旆河南吳楚之人父子相歡戚屬相賀土壤耕闢年穀

豐登舳舻若飛歲月相屬朝廷甄收顯寵荐及出領方面入秉端揆錫圭分社有土為王牧守遠近耆耄農桑工賈飲惠懷德皆願銘石江滸播垂休烈其辭曰

昔在上元中夏猶虞姦兇矯攘鯨毒楚吳帝命信都偏師萬人鐵騎騰凌風行雲奔頓旗偃節敦諭威德兇慝不悛搖蕙恃毒桓桓信都奮髯提戈援桴軍門氣凌山河地祇號風江靈鼓波上殞髦頭下除巴蛇通地之經導天之和人胥已安積十餘年田野豐穰轉漕如川伊

昔有周召虎方叔降及羸秦翦起繼躅履險成功孰與  
為足天子是咨南人是懷享國異都銘功海門陵谷可  
遷碩德長存

平淮西碑

段文昌

夫五兵之設本以助文德而成教化故聖人不專任之  
其有桀鷲暴邪干紀作孽道德不服則兵以威之文告  
不諭則兵以靖之在禁暴除害而已自黃帝堯舜不能  
無誅至湯武受命武功寔盛其本之以仁義行之以弔

伐惟帝與王率由茲道於戲創業之君勞而後定守文之主安而忘戰故三代之衰功在五伯未有中葉之後再安生靈前古所無歸于聖代我唐運之興也高祖太宗以仁義之兵除暴隋之亂戎功祖武百代丕承玄宗嘗亦內翦姦邪外清夷狄所以繼文之代協帝之明既而禍起於微亂生於理由是髓髀之衆結固於兩河斤斧不用繇歷于五紀肅宗親翦大憝且務生育德宗順宗觀于天象察于人事以理運未至沴氣猶凝運故昇

平以俟後聖惟我后握樞出震端宸向明考上玄之心  
思祖宗之意掃滌區宇光啟帝圖不以萬乘為尊四海  
為富遵大禹櫛風之志有光武乙夜之勤以為景擒七  
國而漢氏安成翦三監而周化洽焉有患難未去而德  
教可興日者惠琳恃近狄之固劉闢憑坤維之險李錡  
保長江之衝從史資太行之阻四兇相扇繼為亂常三  
數年間盡膏鉄鑽太尉茂昭以中山之地盡室來朝司  
空弘正以全魏之邦舉宗向闕義風所激莫不歸心況

彭城從折簡之名橫海展執珪之覲向談虞虢之存亡  
議輔車之形勢莫不剗心斷臂繼踵為忠既而麟見於  
巴賈之間河清於鄜衛之際固同本之貺昭聖祚之符  
廓清寰海兆於此矣而長淮右地連山四起控扼吳楚  
密邇輶轅有上帝濯龍之池同異方多馬之國戈鋌雪  
照駟駿雲屯二姓三兇憑阻作孽歲在甲午吳少誠積  
禍而斃餘殃聚於逆嗣氛祲淮瀆我方弔人省冤墾  
災除穢猶命使者持節徃申寵賻以柔服之義示含弘

之仁元濟劫衆拒境滔天肆逆剽葉縣燒舞陽侵襄城  
伊洛之間騷然震恐乃詢廷議咸願假以墨經授以兵  
符天子淵默以思霆馳以斷獨發宸慮不詢衆謀漢宣  
從屯田之議晉武決平吳之計至聖不惑羣疑自消於  
是會鳧藻之師得鷹揚之帥以中軍帥李光顏往者平  
朔邊靖庸蜀雙矛電激孤劔颺馳亦由馮異之搃軍鋒  
子顏之將突騎才氣雄武可掃欃槍搃魏博河陽邵陽  
凡三軍自臨潁而前以河陽軍帥烏重胤當從史內誥

邪謀外阻兵勢精誠奮發獨應王師故得虜魏豹於軍中縛呂布於麾下識慮中正可革梟音益以汝海之地摠朔方義成陝虢劔南西川鳳翔延州寧慶凡七軍由襄陽而進宣武帥韓弘請以子公武領精卒一萬三千時集洄曲藥書作帥鉞為戎右充國討虜印統支軍是能從帥之命成父之志又以壽春守李文通夙精戎韜累習軍旅明於守備可保金湯摠宣武淮南宣歙浙西徐泗凡五軍阨固始之險以鄂岳都團練使李道古以



先曹王臯有任城之武昔征兗渠嘗取安陸授以戎柄  
嗣其家聲乘五關之隘以唐鄧隨帥李愬溫敏能斷靜  
深有謀昔趙孟慕成季之勲復能霸晉亞夫紹絳侯之  
武亦克擒吳想其英徽必有以嗣山南東道荆南凡兩  
軍自文成而東乃命御史中丞裴度布挾纊之恩奉如  
絲之命以諭羣帥以撫輿師且以古之會兵必謀元帥  
令歸於一勢不欲分命宣武軍帥韓弘為諸道行營都  
統假陸遜之鉞拜韓信之壇指蹤畫竒正之機發號申

嚴凝之令然後有司馬之法節制之師而寒暑再罹賊  
巢未下又命內掌樞密之臣梁守謙肅將天威盡護諸  
將懸白日於千里推赤心於萬人由是甘寧奮升城之  
勇君文勵擊堰之志焚上蔡以翦其翼拔郾城以扼其  
吭以軒后攻蚩尤之亂殷宗伐鬼方之罪周公誅淮夷  
之叛雖以聖討逆皆三年後定百辟之議且謂久勞將  
決其機以安海內復命丞相裴度持淮蔡之節撫將帥  
之臣分鄧禹之麾旆盛竇憲之幕府四牡業業于藩于

宣先是光顏重肩公武戎旅同心壘垣齊列長蛇之勢  
首尾相從發胡騎之雄紛紜縱擊逐餘孽如鳥雀獵殘  
寇似狐狸于矛杖行闕于洄曲丞相之來也羣帥之志  
氣逾厲統制之號令益明勢如雷霆功在漏刻賊乃悉  
其精騎以備洄曲之師唐隋帥李愬新搃傷痍之軍稍  
厲奔北之氣城孤援絕地逼勢危而能養貔虎之威未  
嘗矍視屈鷲鳥之勢不使怒形是以收文成柵而降吳  
秀琳下興橋而擒李祐祐果敢多略衆以留之或謂蓄

患不利吾軍懇誠明在躬秉信不撓爰命釋縛授之親  
兵祐感慨之心出於萬死縱橫之計果效六奇粵十月  
既望陰凝雪飛天地盡閉懇乃遣其將史旻仇良輔留  
鎮文城備其侵軼命李祐領突騎三千以為鄉導自領  
中軍三千與監軍使李誠義繼進又遣其將田進誠領  
馬步三千以殿其後郊雲晦冥寒可墮指一夕卷旆凌  
晨破關鋪敦淮潰仍執醜虜雖魏軍得田疇為導潛出  
盧龍鄧艾得田章既登長驅緜竹用制奇勝與古為儔

四紀逋誅一朝蕩定攄宗廟之宿憤致黎庶之又安周漢以還莫斯為盛帝命策勳進弘為侍中光顏重胤並為司空愬為左僕射帥山南東道公武加散騎常侍節制廊坊丹延道古進御史大夫文通加散騎常侍王師獲金爵之賞環境蒙優復之恩掩骼埋胔除瑕宥罪躋羣生於壽域還北戶於可封東西南北無思不服丞相旋請來朝後加金紫光祿大夫封晉國公乃眷淮瀆蒸人生殖俾擇循吏撫其疾傷以宣慰副使刑部侍郎馬

摠領淮蔡之任天子議功雲臺追美將帥俾刻金石以  
揚休勲而百辟僉謀羣帥克讓推義士之志敢貪天功  
徵賢臣之言實在君德於是搢紳之士暨侯服之臣上  
獻鴻名式昭徽策然後光輝千古聲明百蠻詔命掌文  
之臣文昌勒銘淮浦庶乎閱周雅者美宣王之中興觀  
劍銘者戒蜀川之恃險銘曰

天有肅殺萬物以成雷風為令霜霰為刑君有武節四  
海以寧陳之原野阻以甲兵在昔聖王格寧邦國武以

禁暴刑以助德收除害馬農去蠱蠱苟非戎功孰靜羣  
慝明明我后神筭精微九重獨運千里不違宵衣旰食  
再安中寓始翦朔漠旋梟蜀虜丹徒縱滯白門縛布服  
茲肆罪豈勞一旋淮夷怙亂四十餘年長蛇未翦寰宇  
騷然逮于孽童逆志滔天懷柔匪及告諭罔悛帝念生  
人乃申薄伐飛將鷹揚前鋒電發齋壇命信靈旗指越  
我武惟揚妖氣未滅集于洄曲決戰摧兇豹略臨晉維  
留沓中桓桓攘帥應變無窮浮嬰暗渡東馬潛攻合以

長圍絕其飛走布德弋妖升城獲醜商不改肆農安其  
畝洄曲殘兵投戈束手帝嘉羣帥賞不踰時畫社啟封  
珪組陸離洎于蠻貊服我英威刻之金石作戒淮夷

幽州紀聖功碑銘

并序

李德裕

幽州盧龍軍帥檢校左僕射張公仲武往年修獻捷之  
禮今歲有銘勲之請二者君子避之豈不以諸侯有四  
夷之功獻其戎捷春秋舊典也宗周納肅慎之貢銘於  
楛矢天子令德也斯可以為元侯表可以為後代法聖



上嘉其動而中禮乃命宰臣採其元功傳於惇史臣德裕敢颺言曰夫兵者所以除暴害也愛人則惡其為害禁暴則惡其為亂雖獻智不殺化之以神至德允懷招之以禮然書有猾夏之戒傳有循刑之訓虞舜四罪乃成大功文王一怒以至無侮非德教之助歟仁聖文武章天成功神德明道大孝皇帝熙我文典煥乎光明極象外之微臻於至道鼓天下之動致於中和慮必鉤深退而藏密故能神幾獨照成未兆之謀威光遠震制不

羈之虜當其時也烽燧迭警羽書狎至人心大搖羣師  
沮氣皇帝以軒后之威神漢高之大略光武之雄斷魏  
祖之機權合而用之以定王業此議臣所以不敢望於  
清光也倬哉天地應而品物生君臣應而功業成故龍  
躍而雲從鶴鳴而子和方叔伐獫狁蠻荆來威安遠擊  
車師西域震服宜有良將殿于朔邊張公禮闕戰器書  
成傳癖張仲孝友子孺塞淵流落不耦光景未耀明主  
雅聞竒志持印而拜尉軍遙推赤心築壇而命元帥拔

自雄武授之薊門果能精誠奮發策慮徧臆千里獻籌  
一心憂國則知龍顏善將任人傑而不疑日角好謀歎  
敵國而強意迴鶻者本北狄之裔也或曰獯狁或曰山  
戎五帝所不能臣三王所不能制前史載之悉矣暨薛  
延陀之敗也酋帥吐迷度率衆款塞太宗幸靈武納降  
立迴鶻部落置瀚海都督因我封殖遂雄北方代宗之  
戡內難也葉護以射鵰之士親扈戎旌亦由羌髻率師  
以翼周北貊梟騎以助漢既滅大憝乃疇厥功特拜葉

護司空歲贈繒二萬匹厥後擇宗女以配之立宮室以居之其在京師也淫祠雲構甲第幕布棟宇輪奐衣冠縞素交利者風偃挾邪者景附其翎侯貴種則被我文績帶我金犀悅和音厭珍膳蠲蠹上國百有餘年既而桀鷲無親天命不祐僭侈極欲神道惡盈本國荐飢畜產耗半黠戛斯因利乘便遂焚龍庭墟落蕭條陰燐青熒今之烏介可汗亡迷失國竊號沙漠非我策命自為假王其來也羨漫陰山睥睨高闕玄塞之下氛霧蔽天

質貴主以前驅依大國而求援或丐我米糒救其飢人  
或邀我甲兵復其故地外雖柔服內有桀心因行人致  
辭徵呼韓故事願居光祿塞急保受降城其下有二部  
曰赤心宰相那頡啜持勒赤心者天性忿鷙戎馬尤盛  
初與名王嗚沒斯首謀內附俄而負力怙氣潛圖厲階  
為嗚沒斯所招誘以俱竭可汗戮於帳下其衆大潰東  
逼漁陽上乃賜公璽書授以方略公以室韋悍亟之兵  
近我邊鄙俾其偵邏且禦內侵尋以徵役不供為虜所

敗由是介馬數萬連亘幽陵伏精甲於松楸布穹廬於  
磧鹵散若飛鳥止如長雲火燎于原不可嚮邇公激義  
氣以虹貫發精誠而石開竒計兵權密授髦雋乃命介  
弟仲至與裨將游奉寰玉如清左敵萬李君慶張自榮  
高守素李志操率銳兵三萬建旆而前介曹雪照戈矛  
林植命以義殉壯由師直聲隆隆而未洩欲逐逐而不  
食戢以聽命嚴而有威公曰險道傾仄且馳且射胡兵  
所以無敵也致之平原勒以方陣我師可以逞志也於

是據以莽平環以武剛首尾蛇伸左右翼張輕騎既合  
奇鋒橫鶩如摧枯株如搏畜兔攝龍者弗取陸梁者皆  
仆虜侯王貴人計以千數然後盡羅服聽悉數係纍谷  
靜山空靡有子遺橐駝馱馱風澤而散旃墻罽幕布野  
畢收馬牛幾至於谷量虜血殆同於川決徑路寶刀祭  
天金人奇貨珍器不可殫論乃命從事李周瞳馳傳上  
奏又命牙門將國從玘繼獻戎俘皇帝受而勞之羣臣  
畢賀昔長平七征驃騎六舉竇憲合氐羌之衆陳湯檻

城郭之兵或生靈減耗士馬痛傷邀功救罪矯命專征  
然猶告類上帝薦功清廟顧視二漢不其慙歟以公威  
動蠻貊功在漏刻因命公為東面招撫迴鶻使先是奚  
契丹皆有虜使監護其國責以歲遺且為漢謀自迴鶻  
嘯聚靡不鳴張公命裨將石公緒等諭意兩部戮迴鶻  
八百人雖介子討罪於龜茲班超行誅於鄯善未足儔  
也迴鶻又遣宣門將軍等四十七人詭辭結歡潛伺邊  
隙公密賂其下盡得陰謀且欲馳入五原大毆雜虜公



逗留其使緩彼師期竟得人病馬瘠縮馭而退挫銳解  
紛繫公善計今烏介自絕皇澤莫敢近邊并丁令以圖  
安依康居而求活盡徙餘種屈意黑車寄託遠遁流離  
飢凍黑車亦倚其威重迫脅諸戎造謀籍兵解仇交質  
自謂約賈深入漢將取而未期渡幕輕留王師往而非  
利公以壯猷遠御長計羈縻未媮避嫌之便終盡致敵  
之術將時動而得雋豈歲數而勝微矧乎明主杖將帥  
為爪牙視戎狄為鼠彘方獵猛敵不翫細娛非周宣無

以成召虎之勲非漢宣無以聽營平之計勛哉上將光  
我中興公前後受降三萬人特勒二人可汗姊一人都  
督外宰相四人其他侯王騎將不可備載王褒以日逐  
歸德稱為人瑞班固以稽落蕩寇大振天聲孰若天子  
神武百蠻震懼乘其蹙困臨以兵鋒刈單于之旗納休  
屠之附非萬里之伐無三年之勤魏乎成功輝焯後代  
宜刻金石以揚鴻休銘曰

大和之初赤氣宵興開成之末彤雲暮凝異鳥南來胡

滅之徵北夷颯掃厥國土崩逼迫遷徙震我邊鄙長蛇  
去穴奔鯨失水上都薊門近連千里曾不畏天猶為驕  
子丐我邊穀邀我王師假我一城建彼幡旗歸計強漢  
郅支嫚辭狼顧朔野伏莽見羸鴈門之北羌戎雜處澱  
澱羣羊茫茫大鹵縱其梟騎驚我牧圉暴若豺狼疾如  
風雨皇赫斯怒羽檄徵兵謀而泉默斷乃雷聲沈機變  
化動若神明沙漠之北虜無隱情漁陽突騎燕歌壯氣  
赳赳元戎眈眈虎視金鼓誓衆干旄蔽地爰命其弟屬

之大事翩翩飛將董我三軍稟凡之制代師之勤威略  
火烈胡馬星分戈迴白日劒薄浮雲天街之北旄頭已  
落絕轡之野蚩尤未縛俾我元侯恢弘遠略取彼單于  
係之徽索陰山寢烽亭徽纒弓萬里昆夷九譯而通蠻  
夷既同天子之功儒臣篆美刊石垂鴻

唐文粹卷五十九

欽定四庫全書

唐文粹卷六十

宋 姚鉉 編

碑十二 摠八首

家廟

唐西川節度副大使中書令南康郡王韋公

先廟碑 權德輿

唐丞相司空燕國公先廟碑

唐丞相贈太子太師崔公廟碑

韓雲卿

唐淮南節度使李公先廟碑

白居易

唐宣武軍節度使劉公先廟碑

劉禹錫

唐興元節度使王公先廟碑

唐魏博節度使沂國公田公先廟碑

韓愈

唐河陽軍節度使烏公先廟碑

唐故光祿大夫檢校太尉兼中書令成都尹劔南

西川節度副度使知節度事兼管內支度營田觀

察處置統押近界諸蠻夷西山八國雲南安撫等  
使上柱國南康郡王贈太師韋公先廟碑銘

并序

權德輿

萬物本乎天人本乎祖乃立宗廟以安神明德厚流光  
追養繼孝順而下之曰義等而上之曰仁國家稽合禮  
文損益前載崇功貴仕得祠四室於王制酌諸侯二昭  
二穆之義於祭統見君子盡志盡物之誠惟太尉中書  
令南康郡王懿文經武保合昌運左右德宗格于皇天

始恢隴坻之旅終化岷峨之俗貴為上公位極元台克  
肆忠力乃圖孝享作新廟于京師大安里古者揚其功  
烈銘于祭器近古以魯鍾衛鼎追琢先德不若鏤文字  
於麗牲之碑之為詳也乃謹而書之云公姓韋氏京兆  
杜陵人自扶陽重侯用經明至宰相後裔蕃昌德與位  
偕積十六葉至六代祖範字元禮以字行於代仕周為  
車騎大將軍入隋為汴州刺史啓土郟城易名曰莊實  
生孝恪雅有文憲武德初由侍御史為洛州別駕生司



農府君諱機為第一室端誠正志休有厥聲專對出疆  
艱貞復命著西征記以獻太宗嘉之剖符澶州修起儒  
術三典卿曹陟降屯夷操持貴倖不避彊禦繕理宮室  
得其時制史氏書之為唐名臣以夫人隴西郡君辛氏  
配司農生坊州府君諱餘慶為第二室清和修潔履道  
不回歷右驍衛兵曹叅軍以至二千石以夫人武功蘓  
氏配坊州生贈太子少保府君諱嶽為第三室方嚴貞  
幹政事修明在武后時以直忤旨由太原令移佐睢陽

出入四紀績宣中外歷殿中監剖符八州盧海潮號眉  
徐衛陝所至之邦有威有懷凡再追命以夫人扶風郡  
夫人竇氏配少保生贈太子太師府君諱貴為第四室  
盛德循行含章自牧歷藍田尉淑聲流聞上纂崇厚下  
貽風訓凡三追命以夫人涼國太夫人段氏配噫嘻自  
扶陽至郿城積丕烈於前史自考廟至顯考廟流熾昌  
於後葉列於禘嘗儲厥義方故南康郡王苞五常貞四  
教秉靈傑出含道中立初誓偏師建竒功扞大患立大

節以儒衣法冠授律鑿門佩亞相之印綬修元侯之節  
制就加宗工入掌金吾撫征全蜀命賜備厚由地官轉  
天官叅總端右平章宰政進中書令加司徒太尉鉞鉞  
秬鬯旗鑿琯戈有嚴有翼乃蔚乃赫忠厚博大以阜俗  
信廉仁勇以成師南蠻納郾西羌解辮象胥譯戎捷樂  
府陳夷歌守正持重推誠畢力開地通道者九千餘里  
生聚教訓者二十一年天文紀功刻在金石暨德宗棄  
天下太上居諒闇危言急病體國忘身毅然君子之道

卓爾大臣之節永貞元年秋七月考終命于理所策贈  
太師有司奏謚曰忠武公自廟成距今凡八年矣以公  
天子守臣安危注意不得視滌濯承吉蠲而元兄國子  
司業聿實奉朝請薦其常事孝友而才稱於士林初公  
之仲兄曰暈屯田員外郎贈鄧州刺史叔氏曰肇太子  
左庶子兼御史大夫贈左散騎常侍咸以器望而延褒  
錫公之夫人贈魏國夫人張氏其祖禰與外王父皆東  
國鈞為天下華腴嗣子工部員外郎行立銜恤無怙齊

喪中禮大凡四廟之支旁尊羣從烜赫昭融不可勝書  
至若質明光近沐浴盛服虛中以理嘉薦匪解而無違  
心太糝沈齊馨香條鬯既思其志意若聞乎容聲洞洞  
乎屬屬乎有以見舉十倫而備百順昔素王之以戰則  
克以祭則受福其斯之謂乎司業悼手足之凋落感春  
秋以悽愴永懷明發俾篆斯文銘曰

新廟有恤靜深奕奕孝孫匪懈玄衮赤舄洪閔章章乃  
侯乃王漢稱扶陽唐有南康二十三葉沛然蕃昌四室

崇崇斯馬享嘗烈烈南康溫良能斷謀猷樽俎文武楨  
榦沂岐之西稷沴銷散井絡之下天文昭煥撫封全歸  
冥冥德輝聿修孝享家法無違以昭以穆以嗣以續和  
氣婉容苾芬烹熟子孫小大罔不祇肅神之聽之報以  
介福

唐金紫光祿大夫守司空同中書門下平章事充

太微宮使上柱國燕國公于公先廟碑銘

并序

權德輿

國朝之制二品已上祠四廟三公品第一雖有始封亦不敢逾焉元和五年相國司空燕國公立新廟於京師蘭陵里司空公以文武偉才肆勤納忠外貞師律入作公相以平乎水土以調乎陰陽闕惟祖禰尊尊之義昭穆親親之道乃圖廟食以永代德公姓于氏河南人七代祖謹後魏柱國大將軍周太傅三老燕國文公六代祖寔周文左輔隋贈司空燕國安公五代祖象賢驃騎大將軍會昌定公惟三葉有大勲力于北朝乞言而為

惇史體國以全至公四代祖益州郫縣令諱德威夫人  
京兆韋氏曾祖緜州顯武縣令諱玄範夫人北海唐氏  
王父贈刑部尚書諱汪夫人北海王氏烈考贈司空諱  
夔夫人郫國太夫人京兆韋氏凡宗廟之數郫縣為初  
室顯武為二室尚書為三室司空為親室其配各以夫  
人氏交神明之道也惟郫縣顯武遵道服儒廉退潔修  
且曰邠曼容陳仲弓吾之師也故仕不過六百石而以  
理效聞尚書沈冥善閉含道特立以處士燕居至于沒



身凡三追命至大司寇先司空廣大而靜默恭儉而好  
禮合二雅循四教推明理古之學貶絕非聖之書恬智  
交養龜頤不惑起家益州東陽主簿四徙官至寧州真  
寧縣令又再轉至泗州司馬祿至卑而仁及物道未泰  
而志不懾公卿大夫之間尊有道而踈利權天寶末宰  
執擅朝惡其剛介不附已故官止郡佐而慶延身後朝  
典加恩亦三追命曰密州刺史吏部尚書以至於論道  
馬長子頗專良有士行終洋州司戶叅軍家子頊貞幹

強敏程功賦職歷戶部侍郎以公事貶泉州司戶贈楚  
州刺史幼子頃吏理清明仕至長安縣尉司空公即第  
三子也英郎閎達剛方博厚才可以扞大患學可以析  
羣疑彌綸中朝則尚書郎京邑廷尉皆有懿績惠綏外  
服則湖蕪號陝二千石察廉克宣功化繇山南東道節  
度使平章事入覲居中策拜顯尊紹文公安公之爵地  
展盡志盡物之誠敬悽愴怵惕精明吉蠲詩云春秋匪  
懈享祀不忒司空當之矣又曰以妥以侑以介景福先

公宜之矣又狀先公之行其大略曰孔宣父應聘歷國因而老于洙泗我先君宦學於天寶之年而操之者甫忠謂林甫國忠先君於無窮乎又曰小子不敏不通先君之大道不識先君之大行不肖之罪也類是者千餘言其太史公自序之風可以論譏酌之祭器德輿外王母公之從母也故其門中風訓獲周知之忝備重任在公下列公以廟銘見授頓伏上聞尊嚴咫尺實奉面命其傳信不敢曼辭銘曰

燕文三老弼魏佐周安公定公亦播厥猷耶縣顯武一  
同丕矩尚書司空三命追崇義訓忠教公台焜燿乃封  
故地乃建新廟新廟是宜羶蕕告祠齊明盛服乃順乃  
時卑靜以正如親聽命求福不回孝孫之慶刻銘斯碑  
以代承夷

唐丞相贈太子太師崔公廟碑銘

并序

韓雲卿

戊申歲六月尚書左僕射趙國公圓薨天子罷朝三日

喪禮贈賻加異常數詔贈太子太師謚曰昭襄嗣子褒  
遵荷先訓敦率舊禮五月而葬二十五月而祥始立廟  
洛邑曰考廟王考廟皆二丈有七從四尋衡八尋二戶  
立楹外垂四阿圻堦彩繪施以丹雘齋室爨室庭垣稱  
之連族氏勲躅清顯銘其德太師崔氏河東武城人也  
係于齊著于漢荷先少師之純孝溫重稟受元和緯文  
經武為國梁柱賊臣祿山憑犯河華玄宗順動南遊蜀  
漢公為居守有扶掖再造之勲函洛阻絕人惟蠱毒肅

宗振旅朔陸殲靜禍亂公為宰衡有翊贊戡復之謀山  
越之難淮泗之疑茂勳盛業疇為公比禮曰以勞定國  
則祀之能禦大災則祀之能捍大患則祀之是宜廟食  
以銘于鼎以某月之某日寢廟既成庭除既平備器潔  
服儉而中禮先饗七日致齋具物水草陸產醴酪牲牲  
之備外盡物也色溫行宛身屈意愉懼不及內盡志也  
禮卒奠撤齋莊之色如存焉歎息之音如聞焉君子曰  
吾觀崔氏之享有以知禘嘗之義焉古者諸侯立五廟

有鼎與樂有國之制侯伯有爵而無土廟有鼎祭樂不克立  
五廟而立三廟不銘于鼎而銘于碑其銘曰

顯顯太師天孕鴻才恢張碩勳輝輝衡台惟昔茲飭飲  
恩犯順當時無虞區宇駭震玄宗南巡功著巴岷肅宗戡復勳  
揚策牘銷殄氛祲宣明日月於惟太師誰將比烈爰自鼎司出  
鎮淮夷外有亂虜內有疑師欽和畏威遠邇來思於惟太師為  
國藩維功以殲災勞以定國詳考祀典禮存廟食爰立寢廟不  
忘儉易翼翼孝子愉愉其志齋莊懋誠庶物臻備俎豆斯設神

將來既歲時迭移霜露薦至德流慶延昌庇後嗣

唐淮南節度使檢校尚書右僕射趙郡李公家廟

碑銘 并序

白居易

王建侯侯建廟廟有器器有銘所以論譔先德明著後  
代或書于鼎或文于碑古今之通制也維開成某年某  
月某日宣武軍節度使檢校尚書右僕射汴州刺史上  
柱國賜紫金魚袋趙郡李公齋沐祗慄拜章上言請立  
先廟以奉常祀於是得請于天子承式于有司是歲某



月某日經始于東都明年某月某日有事于新廟外盡其物內盡其志三獻百順神格禮成其友居易以李氏宗祖世家名爵與僕射志行官業書于麗牲之碑謹按家畧九代祖善權後魏譙郡守八代祖延觀徐梁二州刺史七代祖續某郡大守六代祖顯達隋潁州刺史五代祖遷皇朝宜穀二州別駕贈德州刺史高祖孝卿右散騎常侍贈鄧州刺史曾祖府君諱敬玄總章儀鳳間歷吏部侍郎同中書門下三品中書令弘文館大學士

監修國史封趙國公謚曰文憲才智職業載在國史今祭于第一室以妣薊國夫人范陽盧氏配馬王父府君諱守一屬世難家政不求聞達避榮樂道與時浮沉終成都府郫縣令祭于第二室以妣滎陽夫人鄭氏配馬先考府君諱晤歷金壇烏程晉陵三縣令府君為人篤於家行飾以吏事動有常度居無惰容所蒞之邑有善政辭滿之日多遺愛不登貴位其命矣夫今祭于第三室以先妣上谷夫人范陽盧氏配馬府君累贈至尚書

右僕射夫人累贈至上谷郡太夫人前後凡三追命六告第渥澤疊洽自葉流根從子貴也郟縣泉晉陵府君咸善積于躬道屈於位儲祉流慶而僕射生焉僕射名紳字公垂六歲丁晉陵府君憂孺慕號踊如成人禮九歲終制孝養上谷太夫人年雖幼承順無違家雖貧甘旨無闕侍親之疾冠帶不解者三載餘可知也執親之喪水漿不入口者五日餘可知也先是祖妣考妣晉陵府君前娶夫人哭氏無子早喪洎叔父兄妹之殯咸未歸祔各處一方公

在斬縗中親護九喪匍匐萬里及期喪事禮無闕違至誠感神有靈烏瑞芝之應事動鄉里名聞公卿言孝友者以為表率憲宗嗣統三年李錡盜據京口公寓居無錫會擢第東歸錡聞公名署職引用初詢以謀畫結舌不對次強以章檄絕筆不書誘之以厚利不從迫之以淫刑不動將僇辱者數四就幽囚者七旬誠貫神明有死無二言名節者以為準程朝廷嘉之拜右拾遺歲餘穆宗知公忠孝文行召入翰林特授司封員外郎知制

誥遷中書舍人承顏造膝知無不言獻替啟沃如石投  
水俄拜御史中丞戶部侍郎既而望屬台衡朝當晏駕  
時移世變遂出掾高要佐潯陽旋為滁壽二州刺史大  
凡公之為政也應用無方所居必化卧理二郡以去害  
為先故有盜奔獸伏之感廉察浙右以分憂為切故有  
郵鄰活殍之惠尹正河洛以革弊為急故有摘姦抉蠹  
之威文宗知公全才以汴難理乃授鉞鉞俾鎮綏之初  
宣武師人驕強恨悍狃亂徼利積習生常公既下車盡知

情偽刑賞信惠合以為用一年而下懲勸二年而下畏服  
三年而下恥格肅然丕變薰然大和撫之五年人俗歸厚  
至於捍大患禦大災卻飛蝗遏暴水致歲於豐稔免人於  
墊溺噫微公之力汴之民其為殫乎其為魚乎殊績尤課  
不可具舉天下征鎮淮海為大非公作帥不足以長東諸  
侯制加銀青光祿大夫楊州長史淮南諸道節度觀察等  
使餘如故詔下之日出次于外軍門不擊柝里巷無吠犬  
從容五日按節而東百姓三軍挈壺漿捧箒簞醪遮道攀

餞者動以萬輩皆嗚咽流涕如嬰兒之別慈母焉噫若非袴  
襦之惠及其幼稚雞豚之養及其老艾推赤心置人腹中  
者則安能化暴戾之俗一至於此乎西人泣送東人歌迎  
梁楚千里風文化移膏雨景星所至蒙福于時開成會昌  
之際上方致理公未登庸颯颯蒼生環望而已盛矣哉大  
丈夫生於世也以忠貞奉乎君以義利惠乎人以黻冕貴  
乎身以宗廟顯乎親以孝敬交乎神宜其荷百祿輔一德  
為有唐之宗臣者歟君子謂李氏之廟也休哉公之祭也

順哉然曰有孫如此有子如此可謂孝也故其碑銘云  
祭祀從貴爵土有秩諸侯之廟一宮三室皇皇西室皇祖  
中書孝孫追遠昭穆有初顯顯中室王父耶令順孫祇享  
盡孝盡敬肅肅東室先考晉陵嗣子奉薦孝思蒸蒸嗣子  
其誰僕射公垂公垂翼翼齋嚴諒直為子為臣有典有則  
載膺休命載踐右職以孝肥家以忠肥國乃授侯伯纛鉞  
旗戟乃饗祖禰牲牢黍稷家聲振耀國典褒飾六命徽章  
三世血食光大遺訓顯揚先德子孫承之垂裕無極



唐宣武軍節度副大使檢校禮部尚書令狐公先

廟碑銘

并序

劉禹錫

今上元年七月十三日汴州刺史宣武軍節度副大使  
知節度事汴宋亳等州觀察處置使銀青光祿大夫檢  
校禮部尚書兼御史大夫上柱國彭陽縣開國伯令狐  
公西嚮拜章上言守臣楚蒙被恩澤列為元侯得立家  
廟以奉常祀制書下其奏于有司於是善相考祥得地  
于京師通濟里居無何新廟成公以守藩故申命季弟

監察御史定卜牲練日越八月丁亥祔饗三室瑁墉以  
尚幽設幄以迎精禮無尤違神用寧謚第二室泰州上  
邽縣尉諱濬以闕太原王氏配第二室絳州昌化縣令  
贈吏部尚書諱崇亮以贈太原郡夫人河東柳氏配第  
三室太原府功曹參軍贈司空諱承簡以妣贈魏國太  
夫人富春孫氏配明年十月公由浚郊以介圭入覲真  
拜戶部尚書進爵為魯侯既辭戎旃得以列侯謁三廟  
是歲南至上不視朝又得以時展祭先期致齋栗然以

敬既齋盡志歆然永思奉其百順陳以具物始躋而虔  
恭終獻而汎瀾既卒事顧麗牲之石宜有刊紀乃俾家  
老授其諜于所知云令狐晉邑也晉大夫魏顥以輔氏  
之功始封焉其易名文國語所謂令狐文子是也其先  
周文王之昭畢公高之裔畢萬為晉卿始封于魏自萬  
至顥蓋四世其後三十七世藍田侯虬仕拓魏為燉煌  
郡太守子孫因家遂占數為郡人藍田之孫熙在隋為  
納言惟上邽府君納言之玄孫道克肖而位不至惟尚

書府君西州之右族光未耀而德已基惟司空府君志  
為君子儒以經學居上第調補安陽縣主簿歷平正縣  
尉汾州司法叅軍陝州大都督兵曹終于太原府首掾  
始以顓經進既仕旁通百家愛穀梁子清而婉左丘明  
國語辯而工司馬遷史記文而不華咸手筆朱墨究其  
微旨愷悌以肥家信誼以急人德充齒耄獨享天爵故  
休祐集于身後徽章流乎佳城凡以子貴承澤降命書  
告第者始贈尚書祠部郎中再贈禮部尚書三加右僕

射四進太保五為上公先太夫人亦四從封密印纍纍  
邦族聳慕生三子皆才彭陽為嗣次子從端實肅給令  
為檢校膳部郎中叅河東軍事季子前所謂為監察御史  
今主柱下方書溫敏而有文綽綽然真令兄弟惟彭陽公  
以辭筆取科名翰飛叅侍從由博士主尚書牋奏典內外  
書命遂登樞衡言文章者以為冠擁節總戎率身和衆留  
惠于盟津變風于浚都言方畧者以為能夫浚師嘆惜難  
治乘釁竊發滯成習俗莅止五載飲和革心車馬來朝人

皆隕涕問公還期觴必祝之留為常伯旋命居守汴人聞公之東近而逾懷翹翹瞿瞿咸西其首言遺愛者可紀焉貴而率禮老而能慕怵惕乎霜露齊莊乎廟祧睦其季仲施及鄉黨闕孝弟者歸厚焉勒銘于碑以代彝鼎文曰

已孤之孝莫如備物顯顯新廟四阿三室時惟仲月卜用柔日醮醴必芬牲牲拞肥膾籩在堂蕭管在庭孝孫蒸蒸恭若奉盈低簪委紳薦俎登鉶躬饗交感流涕緣纓禮以備儀誠以致美祖考來格錫之休祉工祝告訖

退循軒庀乃授風人作詩以紀猗歟彭陽之寵光佐憲  
皇西省東臺迭為侍郎國之大柄咨爾平章敬宗凝旒  
俾鎮雍丘入為地官今守東周彭陽之忠厚宜介福以  
壽東郊既釐可復朝右緜緜其胄系于周舊由我顯起  
必昌其後大和紀元作廟之首刻碑廟門龍集巳酉

唐興元節度使王公先廟碑銘

并序

唐制五等有爵服而無山川登于三軍得立四廟備物  
崇祀以交神明敬先報本以輔孝治有國之令典也惟

長慶三年前相國王公始卜廟于西京崇業里公時鎮  
劔南東川上章曰臣涯官秩印綬品俱第三請如式以  
奉宗廟制可是歲仲冬申命長男孟堅祔其主于三室  
明年公入為御史大夫復以十一月躬行烝祭間歲公  
出梁州就拜司空禮崇異數廟加祀室大和二年增新  
室既成祔顯考尊位告饗由禮觀之者以為世程第一  
室上儀同幽州別駕府君諱元政以妣博陵崔氏配第  
二室湖州安吉縣令贈尚書刑部員外郎府君諱實以



妣贈扶風縣太君馬氏配第三室朝散大夫青州司馬  
贈戶部侍郎府君諱祚以妣贈武威郡太夫人賈氏配  
第四室曰溫州刺史贈太尉府君諱冕以妣贈魯國太  
夫人博陵崔氏配初周王太子晉遇浮丘化為神仙時  
人號曰王家其後遂以命氏顯于秦者曰翦三世將秦  
師子孫分居晉代間東漢有徵君霸霸孫甲亦號徵君  
徙居祁縣為著姓故至于今為太原人自漢涉魏益以  
熾昌凡十葉至後魏度支尚書廣陽侯罔廣陽有二子

神念神感神念南奔梁神感北仕齊惟儀同府君廣陽  
侯五代孫也唐興于太原實從義旗佐成王業故有開  
府儀同之寵惟刑部府君以功臣子理二邑不躋貴仕  
故有錫羨後大之祥惟戶部府君幼孤以孝聞于鄉曲  
未冠以文售于有司由前進士補延州臨安縣主簿會  
詔徵賢良策在甲科授瀛州饒陽尉歲滿遷渭南天后  
在神都而東畿差重遂由渭南轉河陽適建萬象神宮  
甸內吏分董其役因上書切諫繇是名益聞開元初以

大理司直馳駱車聯獻太獄閩禺朔漠至止決平早以  
樂棘傷生晚成劇恙樂就夷曠故不至大官惟太尉府  
君生于治平時以文學自奮年十有五貢然從秋賦明  
年春昇名于司徒又一年玄宗御層樓發德音懸文辭  
政術科以置旄士府君策最高授太常寺太祝未幾復  
以能通道德南華冲虛三真經進監屋尉天寶中歷右  
拾遺左補闕禮部司馬二員外郎屬幽陵亂華遣兵南  
服因佐閩粵改檢校比部郎中行軍司馬時中原甫寧

江南為吉地二千石多用名德乃以府君牧溫州朝廷  
虛公卿以侯高第及聞永嘉人輟春罷社薦紳聞以丕  
淑相弔焉雖位負于道而邁德垂矩後之人得以續承  
丕揚之其儲休啟祐有自云爾生三子皆聰明絕人長  
曰洺以神童仕至檢校禮部郎中次曰潔以奇文仕至  
國子司業今代郡公實季子也早在文仕射策連中咸  
出其家貞元中德宗聞其名自藍田縣召入禁中視草  
厥後三典書命再叅內庭憲宗器之付以國柄翊贊有

道雖策免常居大寮今年自梁州請覲上思用舊臣為  
羽儀遂領太常其公府如故以一心事六君顯官重務  
靡不揚歷且夫起諸生至三公而心愈卑道益廣出授  
黃鉞以臨諸侯入服華章以謁家廟追崇極大位血食  
備多室享全榮而奉昭薦嗚呼公侯之孝歟宜畫廟器  
以視喬公之三鼎其辭曰

闕宇神庭邃清而嚴上公之儀四室眈眈犧以潔牲粢  
以大糝交神尚敬合魂尚氣子姪宗工駮奔奉事副并

修袂儼恪居次孝孫兢兢執爵而升以裸以濯以伏以  
興水陸具來羶薌畢登列于園方其氣增增乃酌乃嘗  
敬而追遠二昭二穆孝以尊本瞻瞻几幄跼跼堂閭禮  
成起慕涕落玄衮濡露踐霜誰無永懷不如達者哀與  
榮偕逢時奮庸誰不得位不如仁人以道為貴惟公之  
達兮名以顯親惟公之仁兮德以澡身六朝之清臣一  
代之全人宜其闕家翼翼振振罔不肅祇于廟門

魏博節度觀察使沂國公田公先廟碑銘

并序

韓愈

元和八年十一月壬子上命丞相元衡丞相吉甫丞相絳召太史尚書比部郎中韓愈至政事堂傳詔曰田弘正始有廟京師朕惟弘正先祖父厥心靡不嚮帝室訖不得施乃以教付厥子維弘正銜訓嗣事朝夕不怠以能迎天之休顯有不功維父子繼忠孝予維寵嘉之是以命汝愈銘欽哉惟時臣愈承命悸恐明日詣東上閣門拜疏辭謝不報退伏念昔者魯僖公能遵其祖伯禽

之烈周天子實命其史臣克作為駟馱泮閼之詩使蔽于其廟以假魯靈今天子嘉田侯服父訓不違用康靜我國家蓋寵銘之所以休寧田氏之祖考而臣適執筆大隸太史奉明命其可以辭謹按魏博節度使銀青光祿大夫檢校工部尚書魏州大都督府長史御史大夫沂國公田弘正北平盧龍人故為魏博諸將忠孝畏慎田季安卒其子幼弱用故事代父人吏不附迎弘正於其家使領軍事弘正籍其軍之衆與六州之人還之朝廷悉



除河北故事比諸州故得用為帥已而復贈其父故滄州刺史兵部尚書母夫人鄭氏梁國太夫人得立廟祭三代曾祖都水使者府君祭初室祖安東司馬贈襄州刺史府君祭二室兵部府君祭東室其銘曰

唐繼古帝海外受制狎于太寧燕盜以驚羣黨相維河北失平號登元和大聖載營風揮日舒咸順指令葉葉魏土嬰兒戲兵吏我愁毒莫保腰頸人曰田侯其德可倚叫諜奔趨乘門請起田侯攝事奉我天明束縛弓戈

考校度程堤疆籍戶來復邦經帝欽良臣曰維錫予嗟  
我六州始復故初告慶于宗以降命書旌節有韜豹尾  
神旗橐兜戟纛以長魏師田侯稽首臣愚不肖逮茲有  
成祖考之教帝曰俞哉維汝忠孝予思乃父追秩夏卿  
媿德娠賢梁國是榮田侯作廟相方視陟見于著龜祖  
考咸喜暨暨田侯兩有文武訖其外庸可作承輔咨汝  
田侯勿亟勿遲覲嚮式時祖考之思

唐河陽軍節度使烏公先廟碑銘

并序

元和五年天子以盧從史始立議用師于恒乃陰與寇連夸謾兇驕出不遜言其執已來其四月中貴人承璀即誘而縛之其下皆甲以出操兵趨譁牙門都將烏公重胤當軍門叱曰天子有命從有賞敢違者斬於是士皆歛兵還營卒致從史京師壬辰詔用烏公為銀青光祿大夫河陽軍節度使兼御史大夫封張掖郡開國公居三年河陽稱治詔贈其父工部尚書且曰其以廟享即以其年營廟于京師崇化里軍佐竊議曰先公既位


常伯而先夫人無加命號名差卑於配不宜語聞詔贈先夫人劉氏沛國太夫人八年八月廟成三室同宇祀自左領軍衛而下作主于第乙巳升于廟烏氏著於春秋譜于世本列於姓苑在莒者存在齊有餘枝鳴皆為大夫秦有獲為大官其後世之江南者家鄱陽處北者家張掖或入夷狄為君長唐初察為左武衛大將軍實張掖人其子曰令望為左領軍衛大將軍孫曰蒙為中郎將是生贈尚書諱承洽字某烏氏自莒齊秦大夫以

來皆以才力顯及武德已來始以武功為名將家開元  
中尚書管平盧先鋒軍屬破奚契丹從戰捺祿走可突  
于渤海上至馬都山吏民逃徙失業尚書領所部兵塞  
其道墜原累石繇四百里深高皆三丈寇不得進民還  
其居歲罷運錢三十萬餘黑水室韋以騎五千來屬麾  
下邊威益張其後與耿仁智謀說史思明降思明復叛  
尚書與兄承恩謀殺之事發族夷尚書獨走免李光弼  
以聞詔拜冠軍將軍守右威衛將軍檢校殿中監封昌

化郡三石嶺軍使積粟勵兵出入耕戰以疾去職貞元十一年二月丁巳薨于華陰告平里年若干即葬於其地二子大夫為長季曰重元為某官銘曰

烏氏在唐有家於初左武左領二祖紹居中即少卑屬于尚書不償其勞乃相大夫授我戎節制有疆墟備禮登壇以有宗廟作廟大都以致其孝右祖左孫爰饗其報云誰無子其有無孫光對無羞乃惟有人昔命平盧為艱為瘁大夫承之危不棄義四方其平士有迨息來

覲來齋以饋黍稷



欽定四庫全書

唐文粹  
卷六十

二十六

唐文粹卷六十